



## PRAHISTORIJSKA GRADINA NA RADOSTOVU – LOKACIJA BUŽIM

Ova mjesna zajednica, koja je osnovana još početkom osamdesetih godina, smještena je između Varoške Rijeke, Bužima, Mrazovca i Bućevaca. Njen najnaseljeniji dio leži duž riječne doline i putne komunikacije Bućevci-Bužim. Ime naselja potiče od naziva brda Radostovo, koje se uzdiže sa njegove jugozapadne strane, čija nadmorska visina iznosi 352 metra. Centralnim dijelom protiče potok Kapetanovac, koji svojim tokom pripada slivu rijeke Bužimnice. Na ovoj riječici, sredinom pedesetih godina prošlog stoljeća, kratko vrijeme je radila mala hidrocentrala, na kojoj se proizvodila električna energija za najosnovnije potrebe javnog života općine Bužim.

Danas u naselju Zaradostovo postoji lijepo urađena zgrada područne škole, sportsko igralište i dom kulture. Prva školska zgrada izgrađena je 1959. godine, na čijim temeljima je izgrađen novi objekat 2003. godine. Pored džamije i mekteba u Zaradostovu, postoji džamija i u zaseoku Abazovići. Glavna saobraćajnica, koja ovo naselje povezuje sa Bužimom i Bućevcima, izgrađena je početkom devedesetih, prije izbivanja rata. U poratnom periodu asfaltiran je veliki broj lokalnih puteva. Pored centralnog naselja, ovoj mjesnoj zajednici pripadaju sela: Abazovići, Piskovac, Zorinovac, Cinci, Grbovice, Pala Gora i Kiurići.